

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI ISNIN, 3 NOVEMBER 2014, PUKUL 10.00 PAGI**

**Bil. 41**

---

**PERTANYAAN-PERTANYAAN BAGI JAWAB LISAN**

1. PR-1323-L65128  
**Dato' Ahmad Fauzi bin Zahari [ Setiawangsa ]** minta **MENTERI PERTANIAN DAN INDUSTRI ASAS TANI** menyatakan adakah teknologi Set Net daripada Taiwan yang bakal diguna pakai di Perairan Sarawak, Sabah dan Labuan tidak akan mengganggu periuk nasi nelayan tempatan di situ yang telah sekian lama menggunakan pukat jerut bagi menangkap ikan di kawasan perairan tersebut. Atau teknologi Set Net itu bakal disalur kepada nelayan tempatan bagi menggantikan pukat jerut.
2. PR-1323-L63370  
**Laksamana Pertama Mohamad Imran bin Abd Hamid (B) [ Lumut ]** minta **PERDANA MENTERI** menyatakan langkah-langkah yang dirancang untuk membasmi kemiskinan penduduk kampung-kampung baru di seluruh negara dan apakah jenis IKS yang dirancang untuk mereka.
3. PR-1323-L65266  
**Dr. Mansor bin Abd Rahman [ Sik ]** minta **MENTERI PELANCONGAN DAN KEBUDAYAAN** menyatakan memandangkan bidang pelancongan merupakan salah satu sektor utama pendapatan negara, berapa jumlah statistik kemasukan pelancongan asing setelah berlakunya peristiwa tragis MH370 dan MH17 dan langkah tambahan bagi mempromosikan Tahun Melawat Malaysia 2014 serta langkah-langkah pencegahan yang diambil oleh syarikat-syarikat penerbangan Malaysia bagi mengelak peristiwa seperti tersebut daripada berulang.
4. PR-1323-L63334  
**Dr. Azman bin Ismail [ Kuala Kedah ]** minta **MENTERI LUAR NEGERI** menyatakan apa sebenarnya yang terjadi dalam kes anggota diplomat Malaysia dituduh terlibat kes jenayah di New Zealand.

5. PR-1323-L65367  
**Datuk Ikmal Hisham bin Abdul Aziz [ Tanah Merah ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan sejauh manakah kejayaan Ops Titik yang bertujuan membanteras penyelewengan diesel bersubsidi dan untuk jangka panjang apakah perancangan Kementerian bagi membanteras perbuatan tersebut.
6. PR-1323-L65192  
**Tuan Mohamed Hanipa bin Maidin [ Sepang ]** minta **MENTERI KERJA RAYA** menyatakan :-
  - (a) apakah langkah-langkah yang telah dan akan diambil oleh Kementerian untuk menyelesaikan masalah kesesakan yang teruk di simpang empat Dengkil di Lebuhraya Dengkil-Bangi; dan
  - (b) adakah Kementerian menimbangkan pembinaan 'flyover' di persimpangan tersebut dan akan membina hentian R&R di lebuhraya tersebut bagi kemudahan pengguna lebuhraya tersebut.
7. PR-1323-L63692  
**Tuan Che Mohamad Zulkifly bin Jusoh [ Setiu ]** minta **MENTERI DALAM NEGERI** menyatakan langkah Kerajaan dalam memastikan tiada rakyat Malaysia yang menyertai aktiviti militan di luar negara serta tindakan Kerajaan dalam membendung kegiatan militan tersebut daripada menular di Malaysia.
8. PR-1323-L65240  
**Dr. Hajah Siti Mariah binti Mahmud [ Kota Raja ]** minta **MENTERI WILAYAH PERSEKUTUAN** menyatakan status Kg. Chubadak Tambahan serta kampung-kampung lain di Wilayah Persekutuan.
9. PR-1323-L64998  
**Dato' Hasbullah bin Osman [ Gerik ]** minta **MENTERI SUMBER ASLI DAN ALAM SEKITAR** menyatakan usaha-usaha memperkasakan penguatkuasaan undang-undang serta pemantauan secara berkala untuk memastikan kualiti air ekoran kelulusan dan aktiviti perlombongan bijih timah yang luas di Kelian Intan khususnya dalam Parlimen Gerik menyebabkan kemusnahan secara besar-besaran hidupan dalam sungai utama dalam kawasan tersebut.
10. PR-1323-L64827  
**Tuan Shamsul Iskandar bin Mohd Akin [ Bukit Katil ]** minta **PERDANA MENTERI** menyatakan :-
  - (a) adakah dijalankan kajian terhadap keberkesanan perkhidmatan bas awam yang dikendalikan oleh Kerajaan Negeri Melaka melalui Syarikat Panorama Melaka Sdn. Bhd. yang mula beroperasi pada 8 Mac 2012; dan

- (b) adakah ianya mencapai piawaian perkhidmatan bas awam seperti garis panduan yang disediakan oleh Suruhanjaya Pengangkutan Awam Darat serta jumlah bilangan bas yang dikendalikan sekarang mencukupi untuk memberi perkhidmatan yang berkesan.

11. PR-1323-L65172

**Dato' Wira Mohd Johari bin Baharom [ Kubang Pasu ]** minta **MENTERI SUMBER MANUSIA** menyatakan mengenai pertikaian di sesebuah organisasi yang diambil tindakan oleh pihak Jabatan Perhubungan Perusahaan, Mahkamah Buruh, dan JTK sejak tahun 2010 sehingga kini. Apakah syarikat yang diambil tindakan dan di bawah akta manakah diambil tindakan dan apakah pihak kementerian bersedia untuk menyeragamkan Akta Pekerjaan 1955 antara Semenanjung, Sabah dan Sarawak.

12. PR-1323-L64883

**Tuan Mohd Rafizi bin Ramli [ Pandan ]** minta **MENTERI PENDIDIKAN** menyatakan jumlah kutipan yuran/bayaran perkhidmatan yang dikenakan ke atas peminjam PTPTN setiap tahun bagi tahun 2010, 2011, 2012 dan 2013 serta bagaimana yuran/bayaran perkhidmatan ini digunakan untuk menampung kos operasi PTPTN.

13. PR-1323-L63648

**Ir. Shaharuddin bin Ismail [ Kangar ]** minta **MENTERI KESIHATAN** menyatakan sejauh manakah perancangan Kementerian untuk menaik taraf klinik-klinik kesihatan di negeri Perlis yang telah dibina lebih dari 20 tahun yang lalu yang didapati tidak dapat menampung pertambahan penduduk seperti di pekan Kuala Perlis.

14. PR-1323-L63865

**Dato' Ngeh Koo Ham [ Beruas ]** minta **MENTERI PENDIDIKAN** menyatakan apakah kriteria kelayakan memasuki Program Matrikulasi kerana setiap tahun terdapat aduan pelajar-pelajar yang mendapat keputusan yang lebih cemerlang dalam Sijil Pelajaran Malaysia tidak diterima masuk berbanding dengan mereka yang diterima masuk. Apakah langkah-langkah yang akan diambil oleh Kerajaan untuk memastikan kemasukan ke Program Matrikulasi dapat dilaksanakan secara lebih adil.

15. PR-1323-L63457

**Datuk Jumat bin Idris [ Sepanggar ]** minta **MENTERI PENDIDIKAN** menyatakan :-

- (a) apakah pelan perancangan pihak Kementerian untuk menampung bilangan pelajar daripada negeri Sabah yang ingin melanjutkan pelajaran ke Institut Pengajian Tinggi Awam, yang mana bilangannya semakin bertambah tahun demi tahun; dan
- (b) adakah pihak Kementerian merancang untuk menambah bilangan Institut Pengajian Tinggi awam di negeri ini.

16. PR-1323-L64209  
**Dr. Michael Jeyakumar Devaraj [ Sungai Siput ]** minta **MENTERI SUMBER MANUSIA** menyatakan berapa ramai pihak majikan Syarikat JCY HDD Technology Sdn Bhd di Kulai Jaya Johor telah didakwa berkaitan penderaan pekerja asing di kilang tersebut yang telah mencetuskan rusuhan pada hujung bulan Ogos 2014. Jika tiada sesiapa dari pihak majikan yang didakwa, kenapa.
17. PR-1323-L65297  
**Dato' Ir. Haji Nawawi bin Ahmad [ Langkawi ]** minta **PERDANA MENTERI** menyatakan pada setiap tahun, Kerajaan menawarkan kepada JKKK Kampung dan juga AJK Masjid bagi setiap Parlimen bagi menunaikan Fardhu Haji. Kebiasaannya tawaran diberi kepada individu yang dipilih tersebut, sedangkan pasangannya tidak dapat ikut serta. Apakah Kerajaan bercadang untuk membenarkan pasangan kepada individu terpilih itu untuk turut serta , dan kos menunaikan haji pasangannya hendaklah ditanggung oleh individu terpilih tersebut.
18. PR-1323-L63413  
**Tuan Wong Sze Phin @ Jimmy [ Kota Kinabalu ]** minta **MENTERI SUMBER ASLI DAN ALAM SEKITAR** menyatakan peruntukan yang telah diberi oleh Kerajaan Persekutuan bagi tujuan mengatasi masalah banjir dan rancangan naik taraf sistem pengairan dan saliran di setiap kawasan atau daerah di setiap negeri bagi tahun 2003 - 2013.
19. PR-1323-L64628  
**Puan Hajah Normala binti Abdul Samad [ Pasir Gudang ]** minta **MENTERI PENDIDIKAN** menyatakan jumlah pengambilan pelajar kedoktoran di Institut Pengajian Tinggi Awam dan Institut Pengajian Tinggi Swasta bagi tahun 2012 sehingga 2014 dan apakah langkah serta tindakan yang diambil oleh pihak Kementerian bagi mengawal pengambilan pelajar kedoktoran di IPTS berikutan isu lambakan graduan kedoktoran di Malaysia.
20. PR-1323-L63533  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI PERTANIAN DAN INDUSTRI ASAS TANI** menyatakan tentang pengeluaran buah-buahan tempatan yang berlebihan pada tahun ini sehingga petani menghadapi masalah tidak dapat memasarkannya. Apakah tindakan Kerajaan untuk mengatasi lambakan buah-buahan ini yang berlaku pada setiap tahun dan adakah tindakan yang diambil dapat menyelesaikan masalah ini.
21. PR-1323-L63919  
**Datuk Raime bin Unggi [ Tenom ]** minta **MENTERI DALAM NEGERI** menyatakan tindakan Polis Diraja Malaysia (PDRM) yang telah diambil terhadap dalang yang cuba menyebarkan propaganda menghasut rakyat Negeri Sabah dengan mengeluarkan kenyataan untuk membawa Sabah keluar dari Malaysia.

22. PR-1323-L64948  
**Tuan Chong Chieng Jen [ Bandar Kuching ]** minta **MENTERI SUMBER ASLI DAN ALAM SEKITAR** menyatakan apakah tindakan Kerajaan berikutan Mahkamah Indonesia menyabitkan kesalahan dua pegawai mewakili syarikat milik Kuala Lumpur Kepong Berhad (KLK) atas kelalaian dan pencemaran jerebu besar-besaran yang mempengaruhi jutaan rakyat Indonesia, Malaysia dan Singapura antara Jun dan Ogos 2013.
23. PR-1323-L63465  
**Tuan Haji Hasbi bin Haji Habibollah [ Limbang ]** minta **PERDANA MENTERI** menyatakan dapatkah Kerajaan membuat kajian untuk kemudahan dan pembangunan industri menggunakan tenaga gas di daerah-daerah terpencil di Sarawak dengan adanya kemudahan "T" yang disediakan untuk menyalurkan gas ke daerah-daerah di Sarawak yang dilintasi saluran gas dari Kimanis, Sabah ke Bintulu, Sarawak khususnya Lawas, Limbang dan Baram agar tidak ketinggalan pembangunannya dari segi perindustrian.
24. PR-1323-L64454  
**Datuk Mohd Idris bin Jusi [ Batu Pahat ]** minta **MENTERI KESIHATAN** menyatakan mengapa Klinik Kesihatan Rengit dibina pada 1956, yang sudah terlalu uzur, sempit dan tidak selesa, serta menyediakan perkhidmatan yang terbatas masih belum dibina semula. Bila pembangunan klinik yang baru akan dimulakan dan bila pula dijangka siap. Sesuai dengan keperluan lebih 40,000 penduduk sekitar apakah perkhidmatan-perkhidmatan yang bakal disediakan.
25. PR-1323-L64762  
**Datuk Hajah Norah binti Abd Rahman [ Tanjong Manis ]** minta **MENTERI PERTANIAN DAN INDUSTRI ASAS TANI** menyatakan adakah terdapat perancangan Kementerian untuk membenarkan syarikat tempatan dan syarikat luar negara bekerjasama secara terus apabila kriteria yang ketat dikenakan untuk permit vesel laut dalam kepada syarikat tempatan yang berminat untuk menggunakan khidmat vesel milik asing memandangkan harga kos yang agak tinggi untuk syarikat tempatan memiliki kapal-kapal yang besar untuk perikanan laut dalam.
26. PR-1323-L64314  
**Tuan Haji Khalid bin Abdul Samad [ Shah Alam ]** minta **PERDANA MENTERI** menyatakan adakah benar Akta Hasutan akan dimansuhkan dan sekiranya benar, bila.
27. PR-1323-L64153  
**Dato' Haji Irmohizam bin Haji Ibrahim [ Kuala Selangor ]** minta **MENTERI PERTANIAN DAN INDUSTRI ASAS TANI** menyatakan apakah usaha Kerajaan untuk mengelakkan aktiviti bom ikan seperti yang berlaku di perairan Semporna di mana dua bot pam ditahan dan mendapati suspek menggunakan bahan letupan yang untuk menangkap ikan basah.

28. PR-1323-L64047  
**Dr. Ko Chung Sen [ Kampar ]** minta **MENTERI DALAM NEGERI** menyatakan :-
- (a) mengapa beliau enggan mendedahkan butir-butir ahli panel Akta Pencegahan Jenayah (PCA), termasuk latar belakang mereka; dan
  - (b) pihak yang bertanggungjawab untuk melantik ahli panel tersebut dan sama ada ahli panel ini bertanggungjawab kepada Parlimen dan rakyat.
29. PR-1323-L64124  
**Dato' Henry Sum Agong [ Lawas ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada Kementerian merancang untuk melaksanakan program rumah murah/mampu milik di daerah Lawas.
30. PR-1323-L65207  
**Datuk Seri Panglima Haji Abdul Ghapur bin Haji Salleh [Kalabakan]** minta **PERDANA MENTERI** menyatakan :-
- (a) apakah Kementerian maklum tentang penyebab sebenarnya mengapa kejadian gajah menyerang di Felda Umas-Umas di Kalabakan berlaku; dan
  - (b) jika maklum apakah perancangan kementerian untuk menentukan agar dapat dikenal pasti dan tindakan sewajarnya diambil untuk mengelakkan perkara ini tidak berulang lagi.
31. PR-1323-L64715  
**Tuan Chua Tian Chang @ Tian Chua [ Batu ]** minta **MENTERI WILAYAH PERSEKUTUAN** menyatakan berapa banyakkah perbelanjaan untuk mengurangkan banjir di kawasan Kuala Lumpur semenjak tiga tahun yang lalu. Adakah pihak kementerian menjalankan tinjauan berkesan terhadap perbelanjaan untuk mengurangkan banjir.
32. PR-1323-L64870  
**Dato' Dr. Mujahid Yusof Rawa [ Parit Buntar ]** minta **MENTERI PELANCONGAN DAN KEBUDAYAAN** menyatakan adakah Kementerian menyediakan penerangan atau syarat-syarat tertentu kepada pelancong asing agar mereka mesti menjaga ketenteraman dan kesopanan di dalam negara.
33. PR-1323-L65111  
**Datuk Haji Shabudin bin Yahaya [ Tasek Gelugor ]** minta **MENTERI PERTAHANAN** menyatakan jumlah aset hartanah seperti kem tentera dan lapangan terbang TUDM yang telah di cadang atau diluluskan untuk dibangunkan sebagai projek komersil. Sila perincikan.

34. PR-1323-L64648  
**Datuk Seri Noh bin Haji Omar [ Tanjong Karang ]** minta **MENTERI PENGANGKUTAN** menyatakan adakah MAS bercadang untuk menghentikan penjualan arak dan memperkenalkan pakaian seragam baru di dalam pesawat.
35. PR-1323-L65216  
**Tuan Manivanan a/l Gowindasamy [ Kapar ]** minta **MENTERI KEWANGAN** menyatakan :-
- (a) bilangan dan nilai aset tenaga yang dimiliki oleh 1Malaysia Development Bhd (1MDB) masing-masing di dalam dan luar negara; serta menjelaskan mengenai bilangan dan nilai kontrak yang berkaitan dengan penajaan kuasa yang dianugerahkan oleh kerajaan Malaysia kepada 1MDB; dan
  - (b) terangkan secara terperinci bagaimanakah 1MDB yang memainkan peranan sebagai sumber dana mewakili kekayaan Negara mempunyai hutang terkumpul kira-kira RM38 bilion selepas hanya lima tahun beroperasi.
36. PR-1323-L64413  
**Tuan Ignatius Dorell Leiking [ Penampang ]** minta **PERDANA MENTERI** menyatakan :-
- (a) perincian bilangan pendatang asing tanpa izin di negeri Sabah; dan
  - (b) tindakan pihak Kementerian dalam menangani isu pendatang asing tanpa izin di Sabah yang semakin meruncing.
37. PR-1323-L64373  
**Tuan Lim Kit Siang [ Gelang Patah ]** minta **MENTERI PENGANGKUTAN** menyatakan sama ada kutipan VEP (Permit Kemasukan Kenderaan) di Johor, bila dilaksanakan sebahagian hasilnya akan diagihkan kepada kerajaan negeri Johor untuk pembangunan rakyat negeri Johor.
38. PR-1323-L63751  
**Dato' Fauzi bin Abdul Rahman [ Indera Mahkota ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah Kementerian bersedia untuk menzahirkan "pusat jagaan" bagi membantu warga emas yang tiada zuriat atau keturunan yang mampu menjaganya. Adakah Kementerian bersedia membiayai "pusat jagaan" swasta sedia ada bagi meringankan beban kewangan mereka.

39. PR-1323-L64437  
**Tuan Charles Anthony Santiago [ Klang ]** minta **MENTERI TENAGA, TEKNOLOGI HIJAU DAN AIR** menyatakan kesudian Kementerian untuk “*declassify*” perjanjian antara Kerajaan Persekutuan dan Kerajaan Negeri Selangor mengenai penstrukturan industri air di negeri tersebut.
40. PR-1323-L63779  
**Dato' Takiyuddin bin Hassan [ Kota Bharu ]** minta **MENTERI SUMBER ASLI DAN ALAM SEKITAR** menyatakan apakah langkah Kerajaan untuk mengawal kualiti udara di negara ini yang sering kali mengalami bacaan Indeks Pencemaran Udara yang kurang sihat.
41. PR-1323-L64710  
**Tuan Ramkarpal Singh a/l Karpal Singh [ Bukit Gelugor ]** minta **MENTERI PENGANGKUTAN** menyatakan usaha-usaha terkini untuk menemui kapal terbang MH 370 dan sama ada satu Suruhanjaya Siasatan Di-Raja akan dibentuk bagi tujuan tersebut.
42. PR-1323-L64636  
**Tuan Wong Ling Biu [ Sarikei ]** minta **MENTERI PENDIDIKAN** menyatakan kenapakah Kerajaan Pusat mengurangkan jumlah pengambilan pelajar yang mengikuti bidang perubatan di semua universiti Kerajaan pada tahun 2014. Adakah pelajar-pelajar yang gagal diberikan bidang perubatan akan diberikan peluang lagi selepas rayuan dibuat.
43. PR-1323-L63627  
**Tuan Tan Kok Wai [ Cheras ]** minta **MENTERI SUMBER MANUSIA** menyatakan apakah pelanggaran hak pekerja yang biasa berlaku ke atas pekerja-pekerja asing di negara ini. Apakah peruntukan undang-undang atau perlindungan-perindungan untuk menjamin kepentingan dan melindungi hak mereka jika timbul aduan mengenai penganiayaan atau salah layanan oleh majikan mereka.
44. PR-1323-L64541  
**Tuan V. Sivakumar [ Batu Gajah ]** minta **PERDANA MENTERI** menyatakan kenapakah kerajaan tidak konsisten dalam memilih dan membuat tuduhan di bawah Seksyen 233 Akta Komunikasi dan Multimedia 1998 dan Seksyen 4 Akta Hasutan 1948 apabila melibatkan individu-individu yang mengeluarkan komen sensitif dalam laman web. Apakah penentuan seksyen diputuskan mengikut cita rasa pendakwa raya ataupun mempunyai motif politik tertentu terhadap tertuduh.
45. PR-1323-L64048  
**Dr. Ko Chung Sen [ Kampar ]** minta **MENTERI PERTAHANAN** menyatakan :-
- (a) bilangan bekas tentera tidak berpencen yang telah menerima bayaran Sumbangan Veteran Tidak Berpencen 1 Malaysia (SVTB1M) sebanyak RM1,000 pada tahun 2013; dan



- (b) apakah status baki daripada dana RM224 juta yang diperuntukkan untuk tujuan tersebut.

46. PR-1323-L63981

**Tuan Lim Guan Eng [ Bagan ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah asas kewangan Bank Rakyat meluluskan pinjaman RM30 juta kepada seorang VIP yang bermasalah sebagaimana didedahkan bekas Pengerusinya Tan Sri Sabbaruddin Chik. Mengapakah YB Menteri yang bertanggungjawab tidak mengambil tindakan saman malu sekiranya beliau tidak terlibat sepertimana yang didakwa.

47. PR-1323-L64266

**Tuan Abdullah Sani bin Abdul Hamid [ Kuala Langat ]** minta **MENTERI SUMBER MANUSIA** menyatakan sektor yang membenarkan pekerja asing bekerja.

48. PR-1323-L63897

**Tuan Hee Loy Sian [ Petaling Jaya Selatan ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan satu badan penguatkuasaan bagi mewakili PRISM, RPM, MACP dan PPM yang memusatkan pengutipan lesen hak cipta lagu bagi peniaga dan restoran yang menyiarkan lagu di premis perniagaan mereka dan berapakah kadar lesen tersebut.

49. PR-1323-L64028

**Tuan Zairil Khir Johari [ Bukit Bendera ]** minta **MENTERI PENDIDIKAN** menyatakan status program 1Murid 1Peranti, termasuk jumlah unit komputer yang dipesan dan di bekal, serta kos perbelanjaan sehingga sekarang.

**ATURAN URUSAN MESYUARAT DAN USUL-USUL**

1. (D.R.15 /2014) **Rang Undang-undang Perbekalan 2015 – Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”  
(30 Oktober, 2014)**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh bilion empat ratus sembilan puluh sembilan juta sembilan ratus sembilan puluh empat ribu ringgit (RM 50,499,994,000) dibelanjakan daripada Kumpulan Wang Pembangunan bagi tahun 2015, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2015, yang dibentangkan sebagai Kertas Perintah 42 Tahun 2014, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

**Menyambung semula Perbahasan atas masalah (30 Oktober, 2014)**

2. (D.R 19/2014) Rang Undang-undang Kewangan (No.2) 2014 **Bacaan Kali Yang Kedua**  
**[Menteri Kewangan]**
3. (D.R 10/2014) Rang Undang-undang Penjara (Pindaan) (No.2) 2014 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”  
(9 Oktober, 2014)**  
**[ Menteri Dalam Negeri ]**
4. (D.R 11/2014) Rang Undang-undang Kewangan (Pindaan) 2014 Tatacara **Bacaan Kali Yang Kedua**  
**[ Menteri Kewangan ]**

5. (D.R 13/2014) Rang Undang-undang Kumpulan Wang Amanah Negara (Pindaan) 2014 “

**[ Menteri Kewangan ]**

6. (D.R 12/2014) Rang Undang-undang Wang Tak Dituntut (Pindaan) 2014 “

**[ Menteri Kewangan ]**

7. (D.R 14/2014) Rang Undang-undang Kumpulan Wang Pinjaman Perumahan (Pindaan) 2014 “

**[ Menteri Kewangan ]**

8. (D.R 16/2014) Rang Undang-undang Suruhanjaya Syarikat Malaysia (Pindaan) 2014 “

**[Menteri Perdagangan Dalam Negeri, Koperasi dan Kepenggunaan]**

9. (D.R 17/2014) Rang Undang-undang Pendaftaran Perniagaan (Pindaan) 2014 “

**[Menteri Perdagangan Dalam Negeri, Koperasi dan Kepenggunaan]**

10. (D.R 18/2014) Rang Undang-undang Perkongsian Liabiliti Terhad (Pindaan) 2014 “

**[Menteri Perdagangan Dalam Negeri, Koperasi dan Kepenggunaan]**

11. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan pinjaman Kerajaan Malaysia sebanyak RM400 juta kepada Malaysia Debt Ventures Berhad (MDV), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Empat Ratus Juta (400,000,000) unit saham biasa pada nilai RM1 bagi satu unit saham”.

12. **Menteri Kewangan** akan mencadangkan:-

"Bahawa Dewan ini, mengikut peruntukan di bawah Seksyen 10(4)(a) Akta Tatacara Kewangan 1957, membuat ketetapan bersetuju supaya Jadual Kedua Akta tersebut dipinda dengan menambah kepadanya butiran baru seperti berikut:-

"Kumpulan Wang Amanah Tabung Konservasi Sumber Asli Nasional"

13. **Menteri Kewangan** akan mencadangkan:-

"Bahawa Dewan ini, mengikut peruntukan di bawah Seksyen 10(4)(a) Akta Tatacara Kewangan 1957, membuat ketetapan bersetuju supaya Jadual Kedua Akta tersebut dipinda dengan menambah kepadanya butiran baru seperti berikut:-

"Kumpulan Wang Amanah Fi Jaminan"

14. PR-1323-U63530

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, ketiadaan "Standby Generator" di Klinik Kesihatan Putatan telah menimbulkan banyak kerumitan kepada pengguna dan pengendali Klinik Kesihatan Putatan. Dan mengambil maklum juga, bahawa dengan kekerapan gangguan bekalan elektrik yang dihadapi oleh Negeri Sabah pada ketika ini, ada kalanya klinik tersebut tidak dapat berfungsi sehingga beberapa jam sehari dan dikhuatiri akan mendatangkan kemudaratan dalam kes kecemasan. Dan mengambil maklum juga bahawa, para pengguna Klinik Kesihatan Putatan bukan sahaja yang datang daripada daerah Putatan tetapi juga dari kawasan berdekatan seperti Tanjung Aru, Kepyau, Petagas dan Kinarut. Dan mengambil maklum juga bahawa, selain keadaan gelap gelita dan kelam kabut ketika berlaku gangguan bekalan elektrik, ianya juga membuatkan rakyat mula merungut tentang mutu perkhidmatan kesihatan yang disediakan oleh pihak Kementerian. Maka, bagi mengatasi masalah, Dewan ini hendaklah mengambil ketetapan bahawa, pihak Kementerian hendaklah memasang "Standby Generator Set" bagi Klinik Kesihatan Putatan."

**[ Kementerian Kesihatan ]**

15. PR-1323-U63531

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, gangguan bekalan elektrik di negeri Sabah kian menjadi-jadi di mana dikatakan daripada tahap teruk kepada tahap parah".

Dan mengambil maklum juga, bahawa setiap kali gangguan bekalan elektrik berlaku, terdapat banyak rungutan dari kalangan rakyat mengenai dengan kerugian daripada segi produktiviti, hasil dan juga kerosakan harta benda. Dan mengambil maklum juga bahawa setiap gangguan bekalan elektrik berlaku, wakil rakyat akan diburu dan dipersalahkan. Dan mengambil maklum juga bahawa, kenyataan demi kenyataan oleh pihak berwajib bahawa gangguan bekalan elektrik di negeri Sabah akan dapat diatasi tetapi sehingga kini gangguan bekalan elektrik tetap berlaku malah semakin kerap. Maka, demi untuk kesejahteraan rakyat, Dewan ini hendaklah mengambil ketetapan bahawa, pihak Kementerian mengambil satu tindakan yang drastik jangka pendek dan jangka panjang bagi mengatasi masalah gangguan bekalan elektrik di negeri Sabah. "

**[ Kementerian Tenaga, Teknologi Hijau dan Air ]**

16. PR-1323-U63540

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, sejak akhir-akhir ini, terdapat banyak seruan untuk membawa negeri Sabah dan Sarawak keluar daripada Persekutuan Malaysia. Dan mengambil maklum juga, bahawa seruan ini adalah kononya berikutan dengan ketidakpuasan hati segelintir rakyat di kedua-dua negeri ini mengenai dengan isu-isu seperti royalti minyak, tarikh kemerdekaan, pengagihan dana pembangunan serta status ekonomi Bumiputera Negeri Sabah dan Sarawak. Dan mengambil maklum juga bahawa, dalam kes negeri Sabah, Isu Pembentangan Laporan Suruhanjaya Siasatan Diraja mengenai pendatang asing tanpa izin yang dikatakan dilengah-lengahkan serta kebanjiran pendatang asing tanpa izin ke negeri Sabah yang dikatakan telah menggugat keselamatan negara, telah memburukkan lagi keadaan. Dan juga mengambil maklum bahawa, sentimen Anti-Persekutuan dan sentimen Anti Sabah dan Sarawak yang dimainkan oleh segelintir pihak kini kian merebak dengan serius dan, ini kalau tidak ditangani dengan kadar segera akan menyebabkan kacau bilau dan menggugat keharmonian negara. Serta mengambil maklum juga bahawa, terdapat juga kenyataan-kenyataan pemimpin Kerajaan, NGO dan orang perseorangan yang dianggap kurang sensitif kepada perasaan penduduk negeri Sabah dan Sarawak. Maka, bagi menangani masalah ini, Dewan ini hendaklah mengambil ketetapan bahawa, Kerajaan hendaklah mengambil tindakan tegas kepada mereka yang bertanggungjawab, sama ada dari pihak awam, NGO, pemimpin Kerajaan dan pembangkang agar sentimen Anti-Persekutuan serta anti Sabah dan Sarawak dapat dibendung. Kerajaan juga hendaklah bertindak untuk menutup mana-mana laman sosial yang telah dibuktikan terlibat dalam gejala ini."

**[ Kementerian Dalam Negeri ]**

17. PR-1323-U63554

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kemalangan yang melibatkan maut terutama sekali kenderaan awam kian meningkat kerana disebabkan oleh pemanduan laju. Dan mengambil maklum juga, bahawa kadar kemalangan ini meningkat terutama sekali dalam musim perayaan di mana para pengusaha dan pemandu kenderaan pengangkutan awam cuba memaksimumkan keuntungan dengan tanpa menghiraukan keselamatan penumpang. Dan mengambil maklum juga bahawa, pihak berkuasa seperti Suruhanjaya Pengangkutan Awam Darat, Jabatan Pengangkutan Jalan dan Polis Diraja Malaysia menghadapi kekangan kekurangan tenaga anggota serta jarak untuk menguatkuasakan had laju. Dan mengambil maklum juga bahawa, kuasa pengguna (penumpang) kenderaan pengangkutan awam boleh membantu pihak berkuasa untuk menentukan had laju kenderaan yang mereka tumpang dengan menegur pemandu tersebut apabila mereka melepasi had laju yang dibenarkan. Dan mengambil maklum juga bahawa pemasangan meter kelajuan kedua serta alat penggera di dalam kenderaan pengangkutan awam akan membolehkan para penumpang menyedari bahawa kenderaan yang mereka naiki telah melepasi had laju yang dibenarkan dan sekali gus menegur si pemandu tadi dan ini dapat mengelakkan kemalangan daripada berlaku. Maka, bagi menangani masalah kemalangan yang disebabkan oleh pemanduan laju, dewan ini hendaklah mengambil ketetapan bahawa, semua kenderaan pengangkutan awam hendaklah dipasang dengan meter kelajuan kedua dan alat penggera. "

**[ Perdana Menteri ]**

18. PR-1323-U63967

**Tuan M. Kulasegaran [ Ipoh Barat ]** akan mencadangkan:-

"Bahawa Dewan ini mengambil maklum bahawa Kerajaan telah gagal untuk perhatin terhadap situasi pemerdagangan manusia dan mengambil tindakan dalam kes-kes pemerdagangan manusia sehingga Malaysia telah turun gred sehingga ke Tahap 3 (Tier 3) seperti yang dilaporkan oleh Kerajaan Amerika Syarikat dalam Laporan Pemerdagangan Orang 2014 (Trafficking in Persons Report 2014 ). Dalam keadaan ini Dewan ini mengarah Perdana Menteri mengambil tindakan untuk mengatasi masalah ini dengan segera."

**[ Kementerian Dalam Negeri ]**

19. PR-1323-U64509

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan dasar dan langkah untuk mencegah ekstremisme di Malaysia. "

**[ Kementerian Dalam Negeri ]**

20. PR-1323-U64511

**Dr. Tan Seng Giaw [ Kepong ]** akan mencadangkan:-

"Bahawa Dewan ini membincangkan dasar perubahan iklim."

**[ Kementerian Sumber Asli dan Alam Sekitar ]**

21. PR-1323-U65224

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis Di Raja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan"

**[ Kementerian Dalam Negeri ]**

22. PR-1323-U65226

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**[ Kementerian Pendidikan ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN</u></b> <b><u>2014</u></b>	<b><u>RISALAT/DOKUMEN</u></b>	<b><u>TARIKH</u></b> <b><u>DIBENTANGKAN</u></b>
DR.8	Laporan Jawatankuasa Kira-Kira Wang Negara Parlimen Ketiga Belas – Pengurusan Pembinaan Kampus Sultan Azlan Shah (Kementerian Pendidikan)	03 November 2014
ST.75	Laporan Tahunan Dan Penyata Kewangan Lembaga Perkhidmatan Kewangan Labuan Bagi Tahun 2013.	03 November 2014
ST.77	Laporan Tahunan Dan Penyata Kewangan Lembaga Totalisator Malaysia Bagi Tahun 2013	03 November 2014
ST.78	Laporan Tahunan Dan Penyata Kewangan Bank Simpanan Nasional Bagi Tahun 2013	03 November 2014
ST.90	Laporan Tahunan Dan Penyata Kewangan Perbadanan Pembangunan Perdagangan Luar Malaysia Bagi Tahun 2013	03 November 2014